

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj 7/10 i 3/23), člana 20. stav (3), člana 21. stav (3) i člana 22. stav (1) tačka a) Zakona o plaćama i naknadama u organima vlasti Zeničko-dobojskog kantona („Službene novine Zeničko-dobojskog kantona“ broj: 1/18, 10/19, 11/19 - ispr., 8/22 , 4/24, 10/24 i 16/25), na prijedlog Ministarstva za pravosuđe i upravu, Vlada Zeničko-dobojskog kantona, na 120. sjednici, održanoj 06.03.2026. godine,  
d o n o s i

## **O D L U K U**

### **O DODACIMA NA PLAĆU NA POSLOVIMA OD POSEBNOG INTERESA I POSLOVIMA S POSEBNIM USLOVIMA RADA**

#### **DIO PRVI - OPĆE ODREDBE**

##### **Član 1.** **(Predmet Odluke)**

Ovom odlukom utvrđuju se visina i način ostvarivanja dodataka na plaću rukovodećih državnih službenika na poslovima od posebnog interesa i državnih službenika i namještenika u ministarstvima i drugim tijelima kantonalne uprave Zeničko-dobojskog kantona (u daljem tekstu: organ državne službe) koji rade na poslovima s posebnim uslovima rada.

##### **Član 2.** **(Poslovi od posebnog interesa)**

Poslovi od posebnog interesa su poslovi radnih mjesta rukovodećih državnih službenika i to poslovi: rukovođenja, upravljanja i zastupanja, te poslovi koordiniranja i usmjeravanja organizacionih jedinica u organu državne službe, poslovi koji nose odgovornost za upravljanje ljudskim, materijalnim i finansijskim potencijalima, poslovi donošenja općih i pojedinačnih akata za koje je zakonom i drugim propisom ovlašteni, ocjena usaglašenosti zakona i drugih propisa koje donose zakonodavni i izvršni organi s ustavom, međunarodnim konvencijama i budžetom, izrada zakona i drugih propisa kao i pravnih mišljenja o ocjeni usaglašenosti propisa sa ustavom, međunarodnim konvencijama, budžeta i drugim propisima za koje se traži ocjena usaglašenosti.

##### **Član 3.** **(Poslovi s posebnim uslovima rada)**

Poslovi s posebnim uslovima rada su poslovi radnih mjesta, na kojima državnim službeniku i namješteniku u organu državne službe, zbog njihove naravi, težine i okolnosti u kojima se obavljaju, prijeti opasnost od ugrožavanja života, profesionalne bolesti ili znatnog narušavanja zdravlja, koje se ne može izbjeći primjenom propisanih mjera zaštite na radu i ostalih mjera shodno posebnim propisima.

## **DIO DRUGI - POSLOVI OD POSEBNOG INTERESA I VISINA DODATKA**

### **Član 4.**

#### **(Poslovi od posebnog interesa)**

(1) Utvrđuju se poslovi od posebnog interesa za Zeničko-dobojski kanton (u daljem tekstu: Kanton) i to:

- a) sekretar Skupštine Kantona,
- b) sekretar Vlade Kantona,
- c) sekretar Sekretarijata za zakonodavstvo Vlade Kantona,
- d) rukovodilac samostalne kantonalne uprave i samostalne kantonalne upravne organizacije,
- e) rukovodilac ureda, stručne i druge službe koje obrazuju Skupština i Vlada Kantona.

(2) Za radna mjesta iz stava (1) dodatak se utvrđuje mjesečno na osnovnu plaću izvršitelja na tim radnim mjestima i za vrijeme odsustva sa rada (godišnji odmor, plaćeno odsustvo, odsustvo zbog bolesti ili invalidnosti, suspenzija i slično).

### **Član 5.**

#### **(Poslovi sekretara Vlade i sekretara Skupštine Kantona)**

Rukovodeći državni službenik koji radi na radnom mjestu i poslovima sekretara Vlade i sekretara Skupštine Kantona, ima pravo na dodatak na osnovnu plaću u visini od 15%.

### **Član 6.**

#### **(Poslovi sekretara Sekretarijata za zakonodavstvo Vlade Kantona)**

Rukovodeći državni službenik koji radi na radnom mjestu i poslovima sekretara Sekretarijata za zakonodavstvo Vlade Kantona, ima pravo na dodatak na osnovnu plaću u visini od 15%.

### **Član 7.**

#### **(Poslovi rukovodioca samostalne kantonalne uprave i samostalne kantonalne upravne organizacije i rukovodioca ureda, stručne i druge službe koje obrazuju Skupština i Vlada Kantona)**

Rukovodeći državni službenik koji radi na radnom mjestu i poslovima rukovodioca samostalne kantonalne uprave i samostalne kantonalne upravne organizacije i rukovodilac ureda, stručne i druge službe koje obrazuju Skupština i Vlada Kantona, ima pravo na dodatak na osnovnu plaću u visini od 15%.

## **DIO TREĆI - POSLOVI S POSEBNIM USLOVIMA RADA I VISINA DODATKA**

### **Član 8 .**

#### **(Vrste poslova s posebnim uslovima rada)**

(1) Utvrđuju se poslovi s posebnim uslovima rada i to:

- a) poslovi inspekcijskog nadzora;
- b) poslovi čuvara šuma-lugara, kontrolnog lugara i geometara;
- c) poslovi sudskog izvršitelja;
- d) poslovi vozača i vozača pratitelja;
- e) poslovi tehničkog sekretara premijera Kantona;

f) poslovi stručnog savjetnika za unutrašnju reviziju u Ministarstvu finansija - interni revizor;

g) poslovi informatičke podrške u Stručnoj službi Vlade.

(2) Izvršioci poslova iz stava (1) ovog člana imaju dodatak na posebne uslove rada i isti se utvrđuje mjesečno na osnovnu plaću izvršitelja na tim radnim mjestima i za vrijeme odsustva sa rada (godišnji odmor, plaćeno odsustvo, odsustvo zbog bolesti ili invalidnosti, suspenzija i slično).

#### **Član 9.**

##### **(Poslovi inspekcijskog nadzora)**

Državni službenik koji radi na radnom mjestu inspekcijskog nadzora u kantonalnom organu državne službe ima pravo na dodatak na osnovnu plaću u visini, kako slijedi:

a) glavni kantonalni inspektor - 30%,

b) inspektor - 30%.

#### **Član 10.**

##### **(Poslovi čuvara šuma – lugara, kontrolnog lugara i geometra)**

Namještenik koji radi na radnom mjestu čuvar šuma - lugar (šumar), kontrolnog šumara ili geometra ima pravo na dodatak na osnovnu plaću u visini od 20%.

#### **Član 11.**

##### **(Poslovi sudskog izvršitelja)**

Namještenik koji radi na radnom mjestu i poslovima sudskog izvršitelja ima pravo na dodatak na osnovnu plaću u visini od 20%.

#### **Član 12.**

##### **(Poslovi vozača i vozača pratioca)**

Namještenik koji radi na radnom mjestu i poslovima vozača i vozača pratioca ima pravo na dodatak na osnovnu plaću u visini 20%.

#### **Član 13.**

##### **(Poslovi tehničkog sekretara premijera Kantona)**

Namještenik koji radi na radnom mjestu i poslovima tehničkog sekretara premijera Kantona ima pravo na dodatak na osnovnu plaću u visini od 20%.

#### **Član 14.**

##### **(Poslovi stručnog savjetnika za unutrašnju reviziju u Ministarstvu finansija-interni revizor)**

Državni službenik koji radi na radnom mjestu i poslovima stručnog savjetnika za unutrašnju reviziju u Ministarstvu finansija-interni revizor ima pravo na dodatak na osnovnu plaću u visini od 20%.

#### **Član 15.**

##### **(Poslovi informatičke podrške)**

Državni službenik i namještenik koji rade na radnom mjestu i poslovima informatičke podrške u Stručnoj službi Vlade ima pravo na dodatak na osnovnu plaću u visini od 20%.

## **DIO ČETVRTI - OSTVARIVANJE PRAVA NA DODATAK I OBAVLJANJE POSLOVA DRUGOG RADNOG MJESTA**

### **Član 16. (Donošenje rješenja)**

- (1) Dodaci predviđeni u odredbama ove odluke, ostvaruju se donošenjem rješenja.
- (2) Rješenje iz stava (1) za državne službenike i namještenike donosi rukovodilac kantonalnog organa državne službe u kojem se državni službenik, odnosno namještenik nalazi u službi.
- (3) Rješenje iz stava (1) za rukovodioca samostalne kantonalne uprave i samostalne kantonalne upravne organizacije, rukovodioca ureda, stručne i druge službe koji obrazuje Vlada Kantona, donosi premijer Kantona.
- (4) Rješenje iz stava (1) za rukovodioca stručne i druge službe koju obrazuje Skupština donosi predsjedavajući Skupštine Kantona.

### **Član 17. (Privremeno obavljanje poslova drugog radnog mjesta)**

- (1) Rukovodilac kantonalnog organa državne službe će donijeti rješenje kojim se osnovna plaća državnog službenika i namještenika uvećava za procenat do 20%, za period u kome, pored poslova svog radnog mjesta, privremeno obavlja i poslove drugog radnog mjesta.
- (2) Kada državni službenik ili namještenik, pored poslova svog radnog mjesta, privremeno obavlja poslove radnog mjesta u drugom kantonalnom organu državne službe, rješenje iz stava (1) donosi rukovodilac organa u kojem je državni službenik odnosno namještenik raspoređen i gdje ostvaruje pravo na plaću, a na osnovu prethodnog zahtjeva rukovodioca organa u kojem se poslovi privremeno obavljaju.
- (3) Rukovodilac organa iz stava (1) (2) ovog člana je obavezan donijeti posebno rješenje o privremenom obavljanju poslova drugog radnog mjesta.

### **Član 18. (Finansiranje dodatka)**

- (1) Isplatu dodatka u slučajevima kada državni službenik ili namještenik, pored poslova svog radnog mjesta privremeno obavlja poslove radnog mjesta u drugom kantonalnom organu državne službe, vrši organ u kojem je državni službenik, odnosno namještenik raspoređen i u kojem ostvaruje pravo na plaću.
- (2) Ukoliko u budžetu organa u kojem je državni službenik ili namještenik raspoređen nisu obezbijedena dovoljna sredstva za isplatu dodatka iz stava (1) ovog člana, organ u kojem se poslovi privremeno obavljaju dužan je doznačiti potrebna sredstva radi isplate dodatka, u skladu sa propisima kojima se uređuje izvršavanje budžeta.

## **DIO PETI - PRELAZNE I ZAVRŠNE ODREDBE**

### **Član 19. (Usklađivanje pravilnika)**

Rukovodilac kantonalnog organa državne službe dužan je u roku od 15 dana od dana stupanja na snagu ove odluke uskladiti interne akte sa odredbama ove odluke.

**Član 20.**  
**(Provođenje Odluke)**

(1) Za provođenje ove odluke zadužuju se kantonalni organi uprave i druga tijela kantonalne uprave.

(2) Za realizaciju rješenja kojim se utvrđuju prava po ovoj odluci zadužuje se Ministarstvo finansija.

**Član 21.**  
**(Prestanak važenja)**

Donošenjem ove odluke prestaje da važi Odluka o dodacima na plaću državnim službenicima i namještenicima koji rade na poslovima s posebnim uslovima rada („Službene novine Zeničko-dobojskog kantona“ broj: 11/23).

**Član 22.**  
**(Stupanje na snagu odluke)**

Odluka stupa na snagu danom donošenja i objavit će se u „Službenim novinama Zeničko-dobojskog kantona“, a primjenjuje se od 01.03.2026. godine.

Broj: 02-02-4408/26  
Datum, 06.03.2026. godine  
Zenica

**PREMIJER**

***Nezir Pivić***

DOSTAVLJENO:

1x Ministarstvo za pravosuđe i upravu,  
1x Ministarstvo finansija,  
1x Sva ministarstva i druga tijela kantonalne uprave,  
1x “Službene novine Zeničko-dobojskog kantona”,  
1x a/a.